

TARIKH	4 / 7 / 2012	SEKSYEN	Nasional
MUKA SURAT	24	RUANGAN	Dlm Negeri

## Waspada tawaran haji murah, cepat giliran

SHAH ALAM 3 Julai - Umat Islam dinasihatkan berhati-hati dengan tawaran pakej mengerjakan haji pada kos yang murah atau perkhidmatan mempercepatkan senarai giliran mereka untuk menunaikan ibadat itu.

Menteri di Jabatan Perdana Menteri, Datuk Seri Jamil Khir Baharom berkata, bakal jemaah haji juga perlu memastikan agensi yang terlibat mempunyai lesen daripada Lembaga Tabung Haji untuk menguruskan jemaah.

Ini, kata beliau, bagi mengelak berlakunya sebarang masalah termasuk wang mereka dilesapkan oleh pihak tidak bertanggungjawab.

"Saya harap bakal jemaah haji tidak terpengaruh dengan tawaran pihak tertentu yang menawarkan kos haji yang rendah dan juga tawaran mempercepatkan senarai giliran menunaikan haji dengan membuat bayaran tambahan

atau sebagainya.

"Ini kerana Tabung Haji tidak pernah membuat tawaran sedemikian kepada agensi-agensi yang berdaftar di bawahnya," katanya kepada pemberita selepas menyampaikan amanat sempena Kursus Pengukuhan Pembimbing Ibadat Haji Tanah Suci (Pihtas) bagi musim haji 1433 hijrah/2012, di sini hari ini.

Turut hadir pada majlis itu ialah Pengarah Urusan Kumpulan dan Ketua Pegawai Eksekutif Tabung Haji, Datuk Ismee Ismail dan Pengerusi Jawatankuasa Penasihat Ibadat Haji, Datuk Seri Hassan Ahmad.

Pada masa sama, Jamil Khir memaklumkan seramai 984,204 rakyat negara ini berada dalam senarai menunggu untuk menunaikan ibadat setakat ini.

Daripada jumlah itu, katanya, sejumlah 12,000 orang daripadanya berusia 75 tahun ke atas dan mereka yang berusia 80 tahun ke atas pula seramai 2,000 orang.



JAMIL KHIR BAHAROM